



MAGASIN MERE DES DORTOIS
MISSIONNAIRES DE L'IMMACULEE-CONCEPT
2300, CHEMIN SAINT-CATHERINE
MONTREAL, P. Q., CANADA

Martyr des Apôtres.

道
原
精
萃

第七冊
宗徒列傳



宗傳

凌

列

天主降生一千八百八十七年

江南主教倪



上海慈母堂梓



伯多祿譯言磐
 石、耶穌以名宗
 徒長、爲聖教基
 趾之義、一日耶
 穌謂曰、我將於
 斯磐石、建我教
 會、將升天、又命
 祭牧群羊、群羊
 喻教衆也、然則
 聖教基於伯多
 祿、後世惟繼其
 位者、實爲真教
 宗主、如今教皇
 良第十三是屬
 此宗主者、爲真
 教士民、外此皆
 係旁門、非耶穌
 所立、



宗徒列傳序

高子一志。我耶穌會士也。前明崇禎間。著聖人行實七卷。其首卷爲宗徒列傳。自問世迄今。幾三百載。教會多艱。梨棗毀敗。卽有數部留存。大都殘章斷簡。鈔補成編。雖聖年廣益一書。亦載宗徒事蹟。總不及高子之詳。特是措詞未能簡淨。而閱者每嫌冗煩也。述事未盡的確。而學士虞其采濫也。有是二者。而欲付手民。自宜先爲參校。丁亥春。江南主教倪大司牧。彙刊道原精萃一書。以是編列第六種。委應公儒望。複考事實。囑林將文詞稍加潤飾。因節其繁。就其簡。事之可疑者。概從刪去。濡毫僭

墨。頗費躊躇。惟愧作句聳牙。屬文鄙俚。不足當大雅品評也。是爲序。

光緒十三年孟秋耶穌會後學李問漁識



宗徒列傳目錄

伯多祿傳

見一張

安德肋傳

見七張

若望傳

見十一張

長雅各伯傳

見十四張

斐理伯傳

見十七張

次雅各伯傳

見十九張

多默傳

見二十一張

巴爾多祿茂傳

見二十三張

瑪竇傳

見二十六張

西滿達陡傳

見二十八張

瑪弟亞傳

見三十一張

保祿傳

見三十二張

附

巴爾納伯傳

見三十七張

路加傳

見三十九張

瑪爾谷傳

見四十張





聖伯多祿

贊

維德之精維道

之英超羣軼衆

聖教先聲大命

恭膺千鈞重責

吾道千城安如

磐石天門總筭

榮寵何窮君臨

司牧敷化報功

致命効忠心堅

金玉架上升天

蘇麻永福



宗徒列傳

伯多祿傳

伯多祿宗徒長也。初名西滿。如德亞國伯撒依達郡人。從父若望兄安德肋俱業漁。聞兄言耶穌乃天主降生。始行教化。卽往謁之。親目其聖德。耶穌甫見。呼其名曰。爾向稱西滿爲若納子。今後改稱責法。按責法辣丁文言伯多祿。中文譯言石。蓋天主將大任是人。故先以相宜之名稱之也。伯多祿蒙耶穌默照。心猶未定。遂辭去。越數日。耶穌遊海濱。見伯兄弟捕魚。召曰。爾輩

且隨我。我將使爾漁人兄弟領命。棄業辭家。拜耶穌爲主。耶穌美其意。殊寵愛之。伯多祿最感主恩。不敢怠忽。以耶穌言行。體味於心。日進於道德。凡耶穌設教施惠。顯行靈事。伯多祿皆近侍焉。時耶穌令聞丕著。士民羣從。嘗至海濱。登伯漁舟。談道慰衆。畢。令伯多祿放船布網。獲魚多不勝取。伯多祿覺耶穌有異能。益深信服。一日伯多祿問耶穌曰。吾輩棄家避世。惟爾是從。將何以酬所望乎。曰。爾輩棄家避世。惟我是從。所獲必百倍於所棄。且將得天上常生之福。伯多祿妻母病瘡。請耶穌往救。耶穌允焉。詣榻前。命病退去。倏然痊愈。無遺恙。自伯多祿從耶穌。

後與妻離間。貞靜終身。未嘗同處。耶穌往他方敷教。一日謂衆徒曰。外人議我何如。對曰。外人之論多且殊。又問曰。爾等云何。伯多祿曰。爾爲基利斯督。活天主子。耶穌曰。爾幸甚。天上父示爾知此。吾將於爾磐石立我聖教之基。遂托以天國之權。自是耶穌恩寵有加。逾於曩昔。某日論聖體奧義。衆人未能悟。門人疑且怪。甚有他適者。耶穌問未去者曰。爾等亦欲散去乎。伯多祿對曰。惟吾主有常生語。吾等焉往哉。可知伯多祿篤信耶穌。無可比擬。某日耶穌欲航小海。遣門人先渡。忽暴風作。耶穌往救。門人大詫異。伯多祿聞耶穌聲。躍身入海。趨而就之。心稍惑。

便溺。急呼耶穌。耶穌提之起。風浪遂息。安然抵岸。後耶穌欲顯榮光。用堅衆徒信志。引伯多祿若望雅各伯。登大博爾高山。發奇異光。門人不克當。昏仆於地。惟伯多祿於恍惚間。求准築居山上。亦以見其仰慕之誠矣。耶穌將受難。豫言被辱。伯多祿持志慷慨。以委命自許。耶穌曰。今夜鷄鳴前。爾言不識我者三。伯多祿自恃太過。未服。耶穌鞠躬取水。濯諸徒足。先及伯多祿。固辭不敢當。卒以主命故。勉從之。旋領聖體聖血。感佩殊恆。是夜耶穌自迎惡黨。被拘受辱。衆徒皆散。惡黨將耶穌擒入公庭。伯多祿憂慘追隨。或問爾是耶穌之徒否。伯多祿愕然。誓不識者。

三。俄聞鷄鳴。蒙主默感。猛醒痛悔。以後每夜鷄鳴。輒垂淚發歎。臥不安席。耶穌復活後。顧伯多祿。慰其憂。訓以將來之事。口授要旨。最爲詳切。既昇天。伯多祿膺統教之職。集諸聖徒。請命於天主。以瑪弟亞補茹答斯惡徒之缺。聖神降臨日。伯多祿渥被神恩。心爲炳灼。出談道。當日化三千餘人。已而化人益衆。訓誨諄諄。不稍懈怠。闢異端。釋群疑。講經旨。傳正理。施惠逐魔。治病勵弱。先後棄邪歸正者。不下數萬人。皆同德同心。相愛如兄弟。其間有夫婦二人。賣產獻資。公之衆信友。第私匿幾許。虛語欺伯多祿。聖人已知之。欲發露其罪。以戒效尤。爰奉天主命。罰夫

婦俱死。令人掩葬之。厥後伯多祿若望同入聖堂。遇一蹙者於門。求聖人施捨。聖人視之曰。我實無金。姑以所有施爾。乃呼耶穌名。令病者起走。立卽痊愈。伏地叩謝。稱揚主恩。衆民間之。爭先來視。二聖人乘機向衆曰。此人病愈。勿嘉美我輩。蓋耶穌聖名之能有以致之。無與我也。衆人信耶穌全能。益欽聖人謙德。由是懷魔染病。目盲耳聾。及諸廢疾者。俱昇至街衢。俟伯多祿至。其身影所經。無弗愈。由是聖化廣行。信者日衆。古教中人。大懷嫉妬。力阻聖教。伯多祿志決不撓。面斥曰。吾儕所見所聞。旣爲實事。安能隱默不言。天主之命。與人之命。二者旣不可兼聽。

甯捨人命。以從主命。未幾。惡黨拘諸聖徒。聖徒以愛耶穌故。受
苦如樂。受辱如榮。聖化乃益盛。伯多祿聞撒瑪利亞人。已信聖
教。未聞精義。親往訓諭。懇主降發聖神。事竣。還協露撒稜。念廣
布聖教。須自邇始。爰歷如德亞本國。繼及他邦。隨在勸善懲惡。
除疾祛魔。施惠禱福。人人感服。去僞歸真。嘗至麗達府城。一人
癱八年餘。聖人命起卽起。又至若白府。會大德婦達比大病死。
教中被其澤者。集聚一堂。述婦生平功德。求聖人復活之。聖人
肯焉。遂懇祈天主。垂允斯民所願。達比大果復活。施恩布惠。視
昔有加。年餘。聖人還協露撒稜。與諸宗徒會議。定立教規。彙紀

天主事理十二端。是爲信經。使從教之人。明知而堅信。諸宗徒分往天主所指之地。傳行聖教。雖萬死不辭。伯多祿所至之國。曰崩多。曰加拉濟亞。曰皮底尼亞。曰厄日多。曰亞細亞。及其左右隣邦。五載布教。立言樹表。朝夕勤勞。擇衆人中。大德高才者。傳授神權。命掌教事。後重至安底凹基亞郡。見民人久聞聖教。俗美風仁。卽定聖座於斯。居七載。忍苦之多。化民之衆。難於殫述。又回協露撒稜。堅勵信人。請訓於聖母。至是。聖教宣揚。從者繁衆。惡黨忌嫉日深。千方謀阻。誣告聖人於朝。假手於當軸。初。如德亞國王黑落得。因惡黨之請。殺宗徒雅各伯。嗣聞伯多祿。

總領聖化。拘而下之獄。諸信人朝夕祈主。垂祐聖人。勿容惡黨之毒。致搖正教之基。天主允焉。遣一天神。開啟獄門。引伯多祿出。伯始疑爲夢。既而醒。訓慰弟子。後避往安底叻基亞府。聞羅馬爲西國名都。異端雜聚。欲往闢之。率數人同行。隨處設教。蒙主庇佑。從者日增。耶穌降生後四十四載。聖人至羅馬。晤相識諸友。先述耶穌聖蹟。堅慰衆心。次察京中時勢。因才分職。布置裕如。又擇數賢徒。散往四方。掌理教事。古今尙論者。溯羅馬被化之始。無不歸功於聖人。且以羅馬爲教會首區。綱維四極。方羅瑪亂。聖座不安。聖人暫歸。協露撒稜。時他聖徒亦在難中。如

德亞人。堅執割損祭牲等古禮。強新奉教者同然遵守。彼此辯議。持久不決。伯多祿召集名人。深究奧旨。將古教禮儀。一併除革。有名西滿者。以魔術行西海。至羅瑪。朝野風從。拜爲神道。先是聖人屢逢其人。隨在驅逐。比聞其肆毒名都。不勝忿忿。立回羅瑪。國王聞聖人爲衆所戴。姑容之。都中有大家女某氏。矢守童貞。王欲妾之而不可得。因羞生忿。誣以大罪。將用重刑。聞此女受教於伯多祿。定志潔修。終身不字。王益怒。下伯獄。教友豫報聖人。懇其潛避。聖人不從。必欲爲道委命。衆人強之切。聖人憫感。暫避城外。甫出城。見耶穌入城。恭問吾主何往。曰。將被釘



聖伯多祿宗徒
 之長也如德亞
 國伯撒依達郡
 人耶穌在生時
 立以為教化皇
 命麥牧群羊傳
 教于如德亞撒
 瑪利亞崩多加
 拉濟亞皮底尼
 亞厄日多亞細
 亞羅瑪等處於
 天主降生後六
 十九年即中朝
 漢明帝永平十
 二年致命於羅
 瑪府在位三十
 五年葬于瓦第
 加諾



於十字架上。伯多祿恍然悟。仍回城中。聚諸門弟。告以主命不可違。無何。惡役至。拘送之獄。伯多祿傳道獄中。施神恩。療疾病。除患祛魔。昭人耳目。凡求教求濟于聖人。無不滿其志願。有役卒二人。兄弟也。恒聆聖訓。觀靈異事。皆醒悟歸正。閱九月餘。惡官枉法。命笞杖伯多祿。發往城外。會保祿亦在獄中。同日發送市曹。故二聖得互相勸慰。齊赴受難處所。伯多祿一見刑具。不勝快意。伏地感謝天主曰。小僕蒙賜十字架。何幸如之。惟望我主加祐。勿使墜志云云。言訖。自就架下。請役卒倒釘。云往日吾主耶穌立釘。今小僕。豈敢與之同刑乎。役卒如言。將伯多祿足

上首下。倒釘于十字架。其靈直登天國。時天主降世六十九年。夏至後七日也。計聖人居教宗位。共三十五載。門人瘞遺骸於淨地。今羅瑪瓦弟加諾是。當時信友。圖聖人像。傳之天下。後公斯當王。捐資建寶殿。四方來朝者。至今弗替。



聖安德肋

贊

大道之輔中流
之柱明目遠聰
懷貞擇主德修
謗與道高毀至
終惡令名欲速
之死金石可磨
日月可缺惟此
一心不污不滅
災我愈德汚我
愈香從容赴義
直上天鄉



我信其性
一貴略耶

蘇基利斯
督我等主

安德肋傳

安德肋伯多祿兄也。業捕魚。性誠樸。輕視貨財。樂聞道德。凡善言善行。莫不企慕而力效之。聖若翰隱居荒野苦修。相機勸民。安德肋聞風往拜。感其德。領其教。決志受業。行弟子禮。一日聖若翰見耶穌過。謂弟子曰。是乃天主羔羊。除免世罪者。安德肋聞言。與一友詣耶穌。耶穌問汝意云何。安德肋曰。吾主寓何地。耶穌引至寓所。談良久。安德肋悟天主降生之旨。歸告其弟曰。經典載天主將降生。吾已遇之。不可不歸依也。遂率弟造見。同遊於聖門。蒙寵後。仍服故業。漁於海濱。一日耶穌見而招之。自

是棄俗清修。終身無倦。耶穌聖名四達。遠人觀光。有不得介紹者。每以安德肋爲先容。其有功於聖門亦大矣。耶穌升天後。宗徒分往各邦。安德肋至細弟亞國。遍歷德辣濟亞。與其左右隣國。卒至額肋濟亞。隨處行奇。廣施恩德。感化百千萬人。去邪歸正。至各林多郡。值一老人。雖已在教。未絕私情。問聖人曰。予欲絕棄舊染。豫防身後患。奈習於邪。已七十餘年。未能一旦改去。安德肋憐之。守齋數日。祈禱天主。賜老人舊習頓泯。日進于德。後其人躬自齋戒。閱六月而終。安德肋至巴大辣府。都人士已奉聖教。太守厄日亞。履新未久。知人民從教者三之二。立下嚴

令行教者殺無赦。聖人憂焉。徑入府署告曰。爾居民上。秉權判事。奈何自恃才能。不畏判爾之上主乎。官曰。聞爾辨闢國神。毀其祠。燼其像。火其書。將國主禁傳之道。廣布民間。有是事乎。安德肋先辯國神虛誕。次陳天主生天地。造萬物。及降生救世之旨。又謂耶穌欲拯萬民於陷溺。不避苦難。甘冒重刑。釘死於十字架。倘天主無是慈心。生民之罪。無由可贖。何以免地獄永患。享天堂永福。然則十字架中。有大味存焉。有大德藏焉。智者知之。愚者不能測。太守笑曰。迂論如斯。明智之士。豈肯信哉。汝宜亟從吾令。改爾狂志。不然。加爾十字架刑。聖人伸言耶穌爲萬

物主。亟宜敬拜。且云十字架之刑。吾望之久矣。太守一時語塞。姑拘囚之。士民感聖人之德。憎太守之虐。欲劫聖人於獄。聖人苦諭安居。衆心乃定。次日。太守召聖人至。謂曰。爾狂志已變。改否。答曰。背邪向正。理也。背正向邪。非理也。安敢從令。背耶穌而求真福。必不可得。何變志之有。太守曰。愚民被汝煽惑。若汝易轍改弦。則縱汝。否則難免上刑。聖人曰。吾與爾辯理。望爾以人心從人理。何竟傲慢若此。反欲陷我於惡。勿冀吾戀性命。畏苦難。背棄吾主。蓋性命受於天主。或遲或早。終當歸還。爲道死于非刑。是增吾功。而倍爾罪。何懼之有。太守大怒。令壯役七人。迭



聖安德肋聖伯

多祿之兄也傳

教于細弟亞德

辣濟亞額肋濟

亞等處天主降

生後六十二年

時中朝漢明帝

永平五年致命

于巴大辣府後

遷葬亞瑪兒斐

府亞利巴里島



用杖索毒鞭四體。流血盈庭。聖人不爲屈。談笑自若。勸勉衆民。太守愈怒。命作一巨十字架。縛聖人於架上。衆民咸爲感傷。謂

德大惠普。何罪致斯。獨聖人忘己危難。更勸諭不止。及見十字架。俯而叩。仰而頌曰。亞物聖十字架。向爲犯人凶具。最可畏者。自懸吾主聖身。染其聖血。反爲至尊大寶。可愛絕倫。吾素望爾。隨處覓爾。茲大幸遇爾。何慶如之。語畢。疾趨就焉。自去衣裳。兵役恣意慢虐。纏縛于架上。後豎架懸空。諷笑殊久。士民哀痛。大哭且號。或稱其功。或述其恩。或奇其事業。惟聖人謝天主慰斯民。不改常度。於是信教者志益堅。未信者心悅誠服。太守見衆

人不肯散。恐作亂。令解釋聖人。役人奉命往釋。手卽痿痺。聖人呼耶穌曰。至慈聖主。吾雖無功。仗爾聖德。幸勿脫我於此架。爾爲吾主吾師。吾生平所奉事。祈賜我靈。不復久居於地。然仰見爾聖顏。言訖。異光降自天。圍繞聖人。其魂上升天國。賢婦瑪詩米辣向受聖人教。厚斂聖屍。瘞於新塚。太守怒。欲罪之。士民怏怏欲亂。乃止。鬼魔入太守之身。殘害摧擾。朝夕不安。尋乃死。聖人墓上。每年出香油如干。可療疾病。且以出油多寡。兆年歲豐荒。數百年後。聖教廣宣。國王感念聖德。加禮尊崇。移聖屍於京都。當時邪魔惶懼。喧鬧震天。似不願聖屍至者。厥後居民蒙恩。

甚夥。未易殫述。又後。聖屍徙至意大利亞國。迄今謹藏於亞瑪兒斐府。墓中歲出香油。救人無算。







聖若望

贊

冥欲者靜冥慮

者安至貞至潔

太璞克完信史

名山縹緗珍重

說性論經心超

如鳳鼎鑊神怡

長途氣壯道外

無門當仁不讓

既孚乎德豈憚

於威何以承眷

全受全歸



我信其因

斯彼利多

三多降學

生於瑪利

亞之兼身

若望傳

若望如德亞國人。家貧。借兄雅各伯漁於海濱。會耶穌廣宣教化。道路往來。偶見聖人修網。寵愛之。召爲徒。若望辭親棄業。決志從遊。耶穌呼爲雷子。蓋豫表其發明聖道。通達四方也。若望日聞聖訓。時觀聖德。大進修途。厥母求耶穌曰。乞賜二子於天上國。在主左右。耶穌曰。爾等不知所求。旋問若望兄弟曰。我將受難。爾等亦能受難乎。對曰能。耶穌曰。汝曹固與我同受難。但升天後。在左在右。非我所主也。聖門諸弟中。若望最幼。清潔逾於他人。故耶穌寵愛之特甚。將受難。發惡徒隱謀。衆徒駕訝無

言獨若望恃愛請曰。誰將害吾主乎。耶穌目如達。以將來之事告若望。後被釘十字架。見聖母與若望侍側。指若望謂聖母曰。此汝子也。又指聖母謂若望曰。此汝母也。自是厥後。若望事聖母無異生母。耶穌崩。若望哀悼特切。嗣聞耶穌復生。不勝欣喜。奔赴墓上。見所遺殮帛。隨卽傳報他徒。嘗出海捕漁。耶穌抵岸。命張網舟畔。得大魚一百五十三尾。若望先識吾主。與衆徒登岸。得瞻聖顏。伯多祿問若望後事。耶穌責曰。我欲存之。直至我再降日。然何與汝事哉。耶穌升天後。若望與伯多祿同登聖殿。遇跛者乞救。聖人呼耶穌名。立愈之。於是聖教廣行。古司祭忌

甚。聖人謂主命當從。何容他顧。惡黨益怒。先囚聖人。後重笞之。聖人深喜受辱。不少屈。事聞撒瑪利亞府。信教者頗衆。諸宗徒請伯多祿若望前往。二聖允焉。乃勸同教士庶。領受斯彼利多。三多神恩。事已。二聖回。協露撒稜。順道布教。不憚煩言。既至。布教化。事聖母。親炙聖德。用勵功修。後往厄弗蘇郡。實行顧言。顯奇証教。居數載。屬邑咸化。而厄弗蘇異端深錮。未易改悛。惡黨訟聖人於官。官故酷信異端者。拘聖人如巨犯。解送羅瑪京都。國王多彌濟亞諾。向習左道。性殘虐。多行不義。嚴拿都中信教者。迨聖人至。親自審訊。聖人辯白是非。攻斥邪說。王頗奇之。但

蒙昧已久。不易挽回。且恣其性。命煮油沸騰。投聖人於鼎。聖人欣然入鼎。仗耶穌神力。毫受傷。左右刑役。反被燒死。王愈奇之。驅聖人於罷德末島。島民素不知理義。以殺掠爲事。聖人循循善誘。表率以道。蒙天主開明。預知未來。筆之於書。以垂後世。今默照經是也。迨羅瑪虐王死。朝臣改政。凡無辜被逐者。皆令返。聖人聞之。還顧所化士民。互相慰勉。島民涕泣攀留。繫駒無術。及歸厄弗蘇。土人歡然迎接。聖人勸人勤修。記錄救世主遺旨。及其生平言行。今若望經是。所以攻斥異端。表章聖教。後世信道昌明。不至流於謬論。此書大有功也。聖人遊隣郡。化一年。



聖若望、宗徒兼
 聖史、如德亞國
 人、傳教于如德
 亞撒瑪利亞厄
 弗蘇等處、當時
 異端橫行、惡黨
 訟于官、聖人被
 拘至羅瑪、受鼎
 鑊之刑、主顯大
 能、未即致命、判
 徙罷德末島、耶
 穌升天後六十
 八年、即漢和帝
 永元十三年、安
 然壽終、享年九
 十三歲、



幼者。性聰穎。爲教中英器。瀕行。託於本郡司教。嗣被損友誘引。爲非作惡。甚至行劫荒郊。數年後。聖人復至其地。聞之不勝痛惜。乘馬往尋。遇於道。其人一見聖人。疾馳隱避。聖人呼曰。兒。勿走避。汝罪雖重。萬勿失望。我雖無功。亦可代爾贖罪。何逃我乃爾。其人聞言。感聖人殷念。下馬伏地。俯首涕泣。聖人亦哭。援其手。令起。安慰之。囑矢志改圖。望主赦宥。遂引入城中。從容訓諭。聖人推愛天主之心。兼愛世人。樂人之樂。憂人之憂。愚昧者啟迪之。懦弱者優容之。雖大憝極惡之徒。苟肯矢志遷改。必也容納。惟遇左道輩。必爲嚴闢。嘗云。惡類如毒螫。不逮爾躬。必辱爾。

名焉。聖人遇門弟。每囑相愛相助相恕。或厭其朝夕言此。罕有他論。聖人曰。此乃耶穌命。成聖之功。於愛德備焉。諸凡善工。不本仁德。虛而不實。何足美哉。聖人齒德並高。切願升天。耶穌默許之。豫示終期。令早爲之備。召諸門弟。諄諄勸諭。後引登山上。作大坎一。別諸門弟。反復叮嚀。已而躍入坎中。異光倏至。神魂直上天堂。時耶穌升天後六十八年。卽漢和帝永元十三年也。享壽九十三歲。生前死後。靈事甚多。茲不備載。



聖長雅各伯

贊

木鐺聲宏金針

法守立已立人

循循善誘維剛

乃斷惟毅乃成

祇知有主不知

有生大德無名

嚴刑無畏一代

雄名千秋正氣

幾希之辨化及

凶頑一朝悔罪

携手天班



我信此
居者比
雖有比
可十處
矣死而
乃

長雅各伯傳

宗徒中有兩雅各伯。以入聖門先後序之。茲所記其長者也。雅各伯如德亞國人。與若望同胞。爲耶穌親串。耶穌始行道。卽召其昆弟爲徒。雅各伯辭親絕世。專志從遊。耶穌寵雅各伯。不啻手足。耶穌升天後。聖人傳道於協露撒稜。旋至撒瑪利亞郡。士民響應。惡黨嫉忌。遂適意西巴尼亞國。初宣教。便化高士七人。分遣各邑。行道勸民。後至撒刺臥雜府。久之。信從者甚寡。聖人憂焉。時聖母瑪利亞。在如德亞國。相去甚遠。默知聖人之憂。托主神力。現於聖人前。善言致慰。囑創建聖堂。永存聖惠。謂此地

之人將欽崇耶穌及其母氏也。言訖不見。聖人感激如死復生。立創聖堂。致敬聖母。既而倍切心神。廣傳聖教。賴耶穌及聖母洪祐。信從者漸衆。閱數年。聖人領天主命。返如德亞國。臨行。聚教中人告曰。吾在斯日久。未忍相別。今奉天主命。不得不從。茲有遺言於爾。萬勿遺忘。吾久居於此。宣傳大教。非我力所能。乃耶穌及聖母之祐。爾等信主。亦非爾力所致。乃天主寵爾而擇爾。吾今無他言。惟欲爾等深感主恩。篤志精修。圖報萬一。倘爾等冀得全功。須以愛主之心。推愛於人。以所受教益。與人同之。蓋仁人得異寶。必公之朋儕。不然。不仁且不智矣。天主聖教。至

寶也。懷在己。不施於人。非仁也。言畢。衆人感泣。送聖人登舟。徑抵如德亞國。會晤同門。敬拜聖母。已而談道勸民。不遺餘力。國人久習古教。固執不從。反欲害之。會惡人厄兒末日溺。廣行邪術。頗得民心。先遣一徒名非肋多。往詰聖人。非肋多潛入聖人之室。欲乘隙陷之。乃見聖人言行。超絕世俗。非常人所能幾及。於是頓悟前非。跪聖人足下。告其來意。懇收爲門弟。聖人鑒其誠。納而訓之。厄兒末日溺愈怒。急圖雪恥。令邪魔拘縛非肋多。寸步不能行。聖人知之。與以恒用之帨。方入手。諸魔頓散。厄兒末日溺更憤。令魔縛聖人及非肋多齊來。魔無能爲力。聖人反

令邪魔拘厄兒末日溺。魔聽焉。聖人令非稱耶穌名。釋其索。魔
卽遠退。至是厄兒末日溺。信服聖教。盡棄其魔術。猶恐爲魔所
攻。祈聖人力護。聖人賜一杖。特若護符。厄兒末日溺。將各種咒
書。當衆人前焚去。國人見此。不勝忿恨。賄營兵大加毀辱。聖人
未之顧。設教依然。証天主降世濟人仁旨。惡黨不能忍。拘執聖
人。恣意鞭撻。奏報國王。王名厄樂德。迷於政。不待明審。遽定聖
人死罪。聖人往市曹時。途遇一痿痺者。稱耶穌之名。令起。病者
聞聲卽起。惡黨相視失色。有若西亞者。翻然醒悟。來歸聖化。聖
人臨刑。忻然有喜色。旣斬。門人遵天主命。恭殮聖軀。送至意西。



聖長雅各伯，如
 德亞國人，與胞
 弟若望同入聖
 門傳教于協露
 撒稜撒瑪利亞
 意西巴尼亞等
 處，後奉天主命
 回如德亞而致
 命，時耶穌升天
 後十一年，即漢
 光武建武十一
 年，葬于意西巴
 尼亞國，工波斯
 得辣府。



巴尼亞國。時耶穌升天後十一年。卽漢光武建武十一年也。閱
五百載。天主欲顯聖人之功。深夜發光。照於墓塚。如是者累日。
民衆咸觀其奇。紛然朝禮。不數年。移屍於工波斯得辣府。後國
王勅建大殿。移奉聖軀。衆民瞻拜。自是意西巴尼亞諸國。咸奉
聖人爲主保。水旱瘟疫寇患等災。禱於聖人。必獲其振拔。某年
海寇至。隨處行劫。官兵禦之不利。國主計無所出。念聖人屢救
國難。號泣致禱。聖人赫然顯現。慰之曰。王勿懼。且再戰。吾將保
汝。國主奉命。拔營迎敵。交兵果獲大捷。殺寇盜過半。國主感念
聖恩。益其殿宇。迄今境內外。凡遇寇盜災難。呼聖人名。多蒙神

祐。





聖斐理伯

贊

媚學則劬守經

則娛讀經論古

導我步趨真主

降生河清可俟

向道來歸聞風

興起見善不及

嫉惡如仇羣邪

破胆惡鬼啾啾

受寵若驚捨生

尤烈山岳發聲

風雲失色



斐理伯傳

斐理伯如德亞國人。幼承親訓。學道讀書。少長。出就賢師。習古經典。探究天主降生奧義。一日。聞人言耶穌豫知來事。洞曉中藏。爲民捍患。逐魔祛病。無一不能爲。斐理伯慕甚。遽往拜謁。且師事焉。自是立志精修。逢人必勸。遇故人納大。引進聖門。耶穌曰。斯忠直無僞人也。納大惶恐對曰。吾主何以識我。曰。斐理伯未召汝。汝在某樹下。吾已鑒汝矣。納大驚服。知耶穌大異於古。今諸聖人。由是日益勤修。蒙主特寵。耶穌嘗於野間。追隨聆訓者數千人。數日乏食。耶穌惻然。謂斐理伯曰。衆人不食已三日。

矣。枵腹以歸。無乃爲餓殍乎。對曰。欲市食。雖二百金。不足以供斯衆。耶穌令衆人席地坐。取一人所資麪餅五枚。小魚二尾。令徒分給衆人。俱得飽飫。斐理伯默感聖功。益欽夫神力。他日有遠方數人。聞風來歸。求見耶穌。祈斐理伯先容。斐理伯與安德肋同引入見。果受大恩。耶穌升天後。諸宗徒各適一方。斐理伯往亞細亞界。闢邪逐鬼。除患消災。士民翕然信服。遍毀魔室。改立聖堂。聖人擇賢弟子數人。代督教務。已則周流各邑。先後計二十餘年。然後入弗利濟亞國。至其都。聞某廟有怪蛇一。愚民敬之如神。焚香頂禮。祭祀祈福。聖人憫焉。徑造廟中。伏懇天主。

令妖蛇自裂死。倒神座下。衆人見之。頌聖人異能。第惡黨藉妖蛇賺財。至是頓失所望。圖報私仇。以重罪誣聖人。控告於太守。太守不加察。拘聖人於獄。奏之朝廷。閱日廷審。以暗殺妖蛇爲罪。定極刑。役夫先以棘杖笞聖人。繼以鐵釘釘于十字架。卒拋巨石殺之。聖人以苦爲甘。愉然謝主。求宥匪人。倏焉天響地震。谷倒山崩。屋宇自相擊撞。傾壓惡人。役夫立十字架旁。橫肆譏侮。自墮深坎中。旋卽殞命。衆人心寒股栗。嘆美聖教之眞。聖人門弟。欲脫聖人於十字架。聖人決意成功。懇主早收其魂。有頃而死。門弟子依禮厚葬之。時天主降生後五十四年。卽漢光武

建武三十年也。後徙聖屍於羅瑪。至今尊之。





伯各雅次聖

贊

同族之親同宗

之選一氣相孚

爲名世彥克已

修正曰嚴曰密

昭事一尊相在

爾室斗山之望

休休有容渾金

璞玉露月光風

異黨無良橫加

嫉妬碎首無身

升天有路



次雅各伯傳

次雅各伯。如德亞人也。於耶穌爲中表。自幼高志。視聽言動。不稍苟且。克已綦嚴。從未放縱其口體。其叩求天主。無間晝夜。遠近仰爲師表。往往欲親炙之。以爲快事。按聖人容貌。肖似耶穌。見聖人儼若見耶穌焉。諸聖徒將散四方。議立雅各伯爲協露撒稜主教。凡聖徒寓都時。有疑難事。必就正於聖人。士民恒瞻模範。時聆訓言。從教之人。不期而日衆。惟古教中人。忌之甚。咸謀害之。百計圖維。有機必乘。然大江之流。豈爲一葦障乎。讐黨伎倆既窮。佯與之交。請聖人詣大堂議事。畢。古教官亞納諾。僞

爲好言曰。吾師爲士民仰戴。古今聖賢。無可比擬。第吾教爲天主親定。斯聖堂。亦古明君建立。邇來士民惑於新創妖說。判然四散。大殿禮儀。廢弛不振。敬主之人。莫不痛心。吾欲挽救之。而無力。惟吾師愛天主於萬物上。當于斯堂中。崇正闢邪。宏施鼎力。乃可免公患而應民望。善莫大焉。况吾師久得民心。苟有所諭。無一不從。聖人姑應之。訂於某日會議。至期。古司教畢集。推聖人高坐。講論至理。故爲善言。諭衆人傾耳聽。又謂聖人曰。衆人在斯。冀吾師明訓。今愚民迷於新說。漸忘大教。敢問耶穌爲何如人。其新教爲何如教也。聖人曰。耶穌乃天主親子。現在天



聖次雅各伯如

德亞國人爲耶

穌中表親，諸聖

徒立聖人爲協

露撒稜府主教

方于聖堂講道

闡揚天主爲惡

黨重擊，遂致命

堂前時，耶穌升

天後三十餘年

卽漢明帝永平

年間，葬于大殿

側，閱數百載，始

靈羅瑪



三 聖 主 承

主罷德助之右。日後降來審判萬民。悉按各人善惡。用昭其賞罰之公。言未訖。惡人聲嘶如雷。謂仁義君子。豈若是乎。斯人顛狂。將陷吾於大謬矣。須臾之間。喧譟不已。甚有築石擊聖人者。衆人逼出高座。推墮堂下。聖人受傷頗重。泰然不失體。反痛恤讐人昏昧。祈主曰。吾主。吾大慈主。請鑒愚誠。勿罪斯衆。彼實不知而爲然耳。惡黨益怒。復持石擊之。或執木棒毆之。聖人默然含忍。祈主堅其心。增其力。不屈於患難之中。又求天主赦宥讐人。禱畢。通體皆傷。傾流鮮血。無何。瞑目而逝。靈魂上升天國。時耶穌升天後三十餘年。卽漢明帝永平六年後也。門弟子瘞葬。

聖屍於大殿側。閱數百載。始遷羅馬。





聖多默

贊

北海雖寬不如

量那東山雖高

不如志卓越境

從師非道不樂

偕死一言雄心

磊落關邪崇正

航海而東停辛

茹苦萬里行踪

抗節不阿守真

不感誰爲干城

聖人多默



多默傳

多默如德亞國人。拘守薄業。養親盡孝。耶穌見其正直無偏。選爲高弟。其克己崇德。遠逾尋常。耶穌將受難。諸宗徒恐懼。請主暫避。獨多默志決意堅。勸衆徒爲義死。耶穌復活後。身發異光。降慰衆徒。多默不幸他出。未及目覩。及歸。衆人告之。多默曰。不見主兩手釘孔。并伸手探其胸。吾不信也。閱八日。耶穌復臨。詣多默曰。來。視吾手。伸手探吾胸。勿懷疑義。多默敬謹奉命。受主寵照。大呼曰。斯眞吾主。天主矣。耶穌藹然曰。汝見我而信。不若不見而信者。爲眞福人。或問耶穌容多默疑復活。其故安在。

曰。以多默一人之疑。釋後世衆人之疑。多默探吾主之胸。實爲萬世可憑之證。故聖賢有云。多默之疑。較他徒之信。益吾尤甚。蓋以一人蹶。爲衆人鑒也。况多默一時昏憤。而其改之速。信之篤。足補前非。何怪之有。耶穌升天後。聖徒分地傳教。多默往印度諸國。入黑人之境。化民無算。旋循小西洋海濱。徑造加辣米納。今瑪里布耳是闢教勸人。不遑朝夕。行靈事。闢邪魔。救人患。善舉不勝數計。不久從化者千萬人。門弟之有賢才者亦日衆。聖人分遣各方。傳行教化。當聖人在瑪里布耳時。國王撒加末。聞風賓禮。講求聖學。旣明。從聖教。百官萬民。皆悅而投誠。第左道邪徒。



聖多默如德亞
 國人、耶穌復活
 後、手探吾主胸
 傷、傳教于印度
 諸國、遣瑪里布
 耳、致命于斯、葬
 于聖殿、時耶穌
 升天後四十二
 年、即漢明帝永
 平十八年、



因失王寵。謀殺聖人。會聖人於城外靜處。獨修思道。惡人蠶湧而至。矢石交下。將聖人奮擊仆地。聖人恬不之怪。仰天正容而卒。時耶穌升天後四十二年。卽漢明帝永平十八年也。門弟子知聖人死。奔往痛哭。稱道聖德弗置。殯聖屍於聖殿。而善瘞之。以聖人携取之杖。受擊之槍。及聖血一罌。俱納墓塚。迄今猶存焉。瑪里布耳信人。確守聖人遺訓。未嘗廢棄。并取聖人之名爲郡名。每年屆瞻禮日。衆人齊集聖殿。誠心祈禱。至今仍之。





聖巴爾多祿茂

贊

扶救世心廣濟

人量物欲不撓

天機還暢誠格

乾元功歸造物

醫國醫民邪魔

自屈上德不德

至仁非仁所過

者化所存者神

嫉惡傷身肌膚

糜爛白璧沉冤

萬民感歎



巴爾多祿茂傳

巴爾多祿茂。生於如德亞國。自幼志學。遇耶穌行道。選爲宗徒。矢志精修。始終弗怠。耶穌升天後。諸徒四散。巴爾多祿茂往亞細亞洲。入里加阿尼亞國。設教闢邪。證以靈事。信從者無算。後往北印度。旋至亞兒默你亞國都。遂宅焉。都中有大廟一。設魔像。能言將來之事。或揭人隱衷。或以邪術致人病。或以形聲駭人。故作妖怪。愚民信之。舉國若狂。溯厥由來。已數百年於茲矣。聖人入其都。魔像弗敢言。人盡疑怪。無有知者。術者詢鄰郡之魔。知因巴爾多祿茂聖徒至。故不言。又問此人何在。何服何容。

何由可遇。魔答曰。是人鬢髮白面。大目隆準。卷鬚中身。服素色。廿餘年未徹。朝夕跪禱百次。敬禮天主。其聲如鐘。其色愉悅。通曉外國方言。不煩學習。天神恒左右之。我今啟口。彼亦知悉。汝欲遇見。非其人允許。不可得也。術者三日遍覓聖人。果不得。聖人途遇一病者。被魔困迫。憫而援之。由是聲聞愈達。會國王博助滿之公主患病。無藥可愈。其母令拜土神。誓願祈禱。不惟不愈。魔反投其腹而擾之甚。國王聞聖人逐魔靈蹟。請入朝。聖人赴命。斥魔遠去。病者立痊。王目擊其奇。感甚。聖人出。王備隆禮。遣官致謝。不遇而歸。日暮。聖人自入朝。門方扃閉。王大驚。聖人

執其手而告曰。吾來王國。非求幣帛寶玉。惟勸善濟衆。揚正闢邪耳。王辱賜儀物。何益於我。因述天主造天地。化人物之實蹟。又言天主降生受難。贖罪救民之慈旨。明証聖教當遵。邪神當絕。又約於某日。在衆民前。令魔鬼自認其惡。言訖。忽不見。國王恟恍如夢。終夜反側。及旦。下令國中。某日人民聚某寺中。至期。國王偕臣民抵至。衆人相顧駭訝。不知將行何事。聖人登寺堂。令衆人靜候。乃命寺中魔像。自言由來。魔不獲已。發聲曰。吾來此。無正意。惟惑亂民心。令人尊我。予非眞主宰。亦非眞主忠臣。乃眞主所罰於地獄之魔鬼也。吾明告汝。耶穌非世上人。實天


主親子。其降生而死。皆爲贖民之罪。非自犯罪而受難至死也。

耶穌升天時。遣宗徒布教萬方。斯

指把爾
多祿茂

卽宗徒之一。不可不

聽其言。語畢。衆皆惶悚。頓覺被魔欺誑。枉費精神。冒犯重罪。遂相與傾魔座。毀魔像。踐魔身。火之成灰燼。當毀時。見一人短且黑。從像中出。面甚長。目作黃色。火星爍發。頤下生有雜髭。鼻發黑燄。腰帶火鍊。衆人見之。悸怖戰慄。聖人命奔往荒郊。魔卽遁去。發聲如雷。自是國主臣民。絕邪歸正。領聖訓。受聖水。以魔寺改天主堂。國都旣化。外郡十二城。爭先倣倣。邀聖人設教。病者愈之。憂者慰之。弱者扶之。愚者誨之。衆民共沐洪恩。愛戴聖人。



聖巴爾多祿茂
 如德亞國人傳
 教于亞細亞洲
 入北印度利高
 尼亞亞爾默尼
 亞等處卒乃致
 命時耶穌升天
 後六十六年即
 漢和帝永元十
 二年墓在意大
 利亞利巴里島



如父母。聖人選門下士若干人。代司教政。督率衆民。惟邪魔爲聖人所驅。不勝忿恨。煽惑惡人。會盟結約。合力謀害聖人。有王弟名亞斯的亞日。出封外郡。幼習異端。惡徒就而訴之。王弟嗔怒。遣役拘繫聖人。嚴審其來意。問何故闕我先祖之教。別立教門。使愚民毀神像。聖人多方開導。莫解其迷。王弟命刑役。先執鐵杖。毒撻聖人。已而剝全身之皮。骨肉俱露。流血如注。獨聖人未嘗變容。勸人勿畏世苦。用冀永久之福。言訖。求主垂祐。俯首待命。役人斬決之。時耶穌升天後六十六年。卽漢和帝永元十二年也。門弟子數日痛哭。葬以聖人之禮。士庶臣工。若喪父母。

黨人刑役。皆於一月內。受困患而死。蓋天主罰之也。無何。信人朝聖墓。受澤甚多。惡黨不勝其忿。藏聖屍於鉛棺。投入深海。欲滅其跡。詎天主全能。使棺在海浪中。飄至意大利亞國利巴里島。事聞奉教士民。恭迎聖屍。而重葬之。



聖瑪寶

贊

有罪何傷有過

非病但肯自新

桀跡可聖奇哉

瑪寶本是計臣

一朝感悟返璞

歸真八載周遊

發聾振聵功効

靈奇當王者貴

道高種怨德盛

招殃殿中流血

千古馨香



聖相通功

聯百亞諾

西公厄格

我信有聖

瑪竇傳

瑪竇如德亞國加納府人。幼嘗務學。長爲國家聚斂。鄉人惡之。一日耶穌過其門而目之曰。汝且從我。瑪竇聞命。棄家務。遽入聖門。并率其宗族鄉黨。咸來受教。耶穌升天後。聖人遍遊如德亞。及厄日多。凡八載。講明眞道。多行靈跡。歸化之人。以億萬計。聖人念耶穌事實。猶未紀錄。恐後之人無由考稽。乃誌其親見親聞之言若行。垂於後世。是爲瑪竇經。其有功於人世。非可以言語形容也。閱八載。至厄弟奧比亞入納打伯郡。逢一內臣。向從聖教。遂主其家。同心協力。勸導衆民。聞城中有二巫焉。借托

魔術。以謬論惑人。聖人惜之。先聚遠近士民。善言訓導。後訂期
攻斥二巫。及期。當衆人前剖辨是非。闢其邪妄。二巫詞窮理屈。
用咒召魔。忽致蛇蝮。驚駭愚民。聖人畫十字以逐之。民見蝮蛇
去。更服聖人。棄絕諸邪。國王名厄日玻。止生一子。病而死。痛之
哀。召二巫復生之。巫竭力殫精。招魂無術。王請聖人施救。聖人
先求天主。後命世子復活。安好如前。國王及諸朝臣觀此奇功。
感佩稱讚不置。王蒙主大恩。無以爲報。立誓從聖教。率群臣卽
日踐言。不少遲緩。公主意非日你亞。以賢淑聞。知聖教之名。遽
與王同歸正教。且矢志守身。終身不字。宮中童女數輩及世家



聖瑪竇、宗徒兼
 聖史、如德亞國
 加納府人、應耶
 穌召、進棄俗務、
 投入聖門、傳教
 于如德亞、厄日
 多厄弟奧比亞
 等處、卒乃致命、
 時耶穌升天後
 五十八年、卽漢
 和帝永元三年、
 葬于意大利亞
 撒肋諾郡、



女約二百人俱從之。自是聖教通行。萬民鼓舞。聖人竭力提撕。日無寧晷。閱二十三載。基業畧備。國王壽終。世子穉幼。王叔異兒大各廢世子而奪其國。欲娶意非日。你亞爲配。聞公主受教於聖人。非聖人命不可相強。因徵而告之。聖人不答。第請公主朝臣大會殿廷。聖人登座宣言曰。婚姻爲五倫之首。劬勞瑣碎。苦不堪言。生民常蹈其轍。未能識破。惟守貞者。密邇天神。超越塵世。內寧外安。光輝照著。身居下地。神已在天。公主聞言。奇喜。貞志益堅。謝絕王叔之請。王叔怒。命誅聖人。某日。聖人行祭主禮。刑役突入殿中。提槍直刺。聖人受創後。仰天祈主。仆地而卒。

時耶穌升天後五十八年。卽漢和帝永元三年也。聖人既歿。葬於意大利亞國撒肋諾郡。神澤廣施。不勝屈指。意非日你亞執善意。不願成婚。王叔命積薪焚其宮。火方作。聖瑪竇出現空中。撲滅大火。凡謀害聖人者。皆以生瘡死。



聖 達 陡

贊

如屋之楹如國
之城玉璽金治
具此精英有善
必承無美不濟
倡汝和余難兄
難弟養心坦坦
誨爾諄諄蟠天
際地一視同仁
正士則從異端
則害三德克全
曰信望愛





聖西滿

贊

事必有因物必
有親近朱者赤

感化乃神我聖

西滿靈淑所鍾

誼關休戚爲道

之宗籲主顯威

秉鐸傳教氣懾

仇魔誠通大化

效死忘辱拳石

猶怡高風落落

是百世師



西滿達陡傳

西滿達陡。同胞兄弟也。生於如德亞國加納府。與聖母有戚誼。少聞道。自耶穌選爲宗徒。積德立功。並躋聖域。耶穌升天後。二聖同至一方傳教。已而欲廣其化。西滿入厄日多國。達陡入墨索玻大米亞國。數載間。勸化千萬人。每舉高弟掌教事。已則適他境。二聖人嘗會於伯爾西亞國。其地近印度。素習邪說。境內多偶像。能與人言語。愚民尊敬之。迷不知返。二聖至其地。像卽不言。衆人疑怪特甚。莫能索解。時有一將帥。奉命討賊。欲豫卜交綏勝負。親祭魔像。久之。像無一語。遍詣他像。皆如是。鬱鬱欲

歸卒有一像言曰。汝何多瀆爲。今有耶穌二徒。一曰西滿。一曰達陡。行道此方。吾輩不能語。故未應焉。將軍遍訪二聖。既遇。迎有加禮。乞示出師利害。二聖偕將軍至神像前。命魔自言。釋將軍之疑。魔弗敢違。答曰。出征凶。彼此多死亡。數歲紛亂。將軍聞言惶懼。二聖大笑。將軍問其故。曰。將軍勿懼。次日辰時。敵人遣使求和。君罷師而歸。且掠地矣。邪徒曰。是言迂闊。豈可信哉。爾二人非我族類。何事來此。恐爲敵人內應。將軍懷疑莫決。留惡黨與二聖人。俟事驗而賞罰之。次日辰刻。敵使果至。事已。將軍厚贈二聖。擬斬邪徒。二聖辭贈儀。爲邪徒求救曰。吾儕來此。本

爲裨益斯民。何忍坐視稠人受戮。將軍從命釋之。亦可見聖教以德報怨。不敢加害於人也。至是。將軍益重二聖。邀與晉京。會都中有二妖巫。卽聖瑪竇自印度逐出者。妖巫縱蟒蛇肆毒。居民苦之。二聖知爲魔幻。先乞天主降祐。命蟒蛇不害他人。祇害巫者。蟒蛇承命。巫以不克久留而去。國君聞二聖名。敦請入朝。顯靈講道。君臣皆領聖水。士民草偃雲從。多有棄邪投教者。貴家女某氏有外遇。成胎生子。親戚逼指姦人。女爲魔所惑。妄指聖人弟子某甲。親戚怒。拘送於官。聖人隨之往。令携所產嬰兒至。聖人向衆問。嬰曰。吾賴耶穌名。命汝言某甲果爲汝父否。兒

對曰。甲乃善士。非吾父。親戚求聖人。令兒明指其父。聖人辭焉。曰。甲遭不虞之患。故援救之。若發人覆而洩其隱惡。非我所爲。衆人歎服。益敬聖人。兼信正教。聖人往刷米爾大郡。逢往日所逐二巫。讐恨聖人愈甚。遍播謗言。謂二聖拒闕土神。毀寺廢像。土人恐害及其身。謀所以除患。遣數人縛二聖至。詈而責之。令拜魔像。聖人不肯。求主彰顯聖威。發露二巫詭計。倏焉天響地震。偶像毀裂。像中奔出惡魔。聲響駭人。民衆不惟不悛。反生忿恨。毒毆二聖至死。當是時。日白天青。狂風雷雹忽作。敗毀鬼寺。惡黨與二巫。俱被壓。國君聞之。以聖教爲祥。葬二聖於新殿。後

遷至羅馬迄今尚存。







聖瑪弟亞

贊

後起之英先知

之哲擇主而從

既勤且密聖瑪

弟亞艱難克承

聖神默眷大位

終膺譽望既優

感激愈甚闡教

遐方夜不安枕

狂瀾雖挽身命

俄傾幸哉一死

長享天榮



瑪弟亞傳

天主降世。振拔萬民。率之正道。初選十二徒。令傳聖教。詎茹達意。斯加蒙耶穌收入聖門。偏與惡黨相約。負賣耶穌。遂致受難。釘死。不勝慘惻。茹達自知罪重。絕望升天。懸樑自縊。耶穌升天後。諸宗徒議補其缺。於七十二弟子中。遴選二人。一曰若色。一曰瑪弟亞。引登堂上。告天主曰。吾主。爾明識世人隱念。莫可少匿。乞賜知二人中。孰可補茹達之缺。求已。書二人名拈鬮。天主明顯聖旨。選瑪弟亞。聖人感激主恩。矢志自勵。宣傳聖教。由近及遠。自如德亞諸邑。至厄弟奧比亞國。冒苦含辛。宣化施澤。

其所行聖蹟。與從信者幾人。古史未嘗明載。惟謂聖德至極。聖道克成。卒中惡人計。爲義捨生。門人恭瘞聖屍。後徙于羅瑪。





聖保祿

贊

明遠之資古訓

是師不厭不倦

好學深思猛力

回頭投誠矢願

苦海無波迷津

有岸闡揚大化

功及羣生艱難

忍辱困極而亨

節重身輕主尊

命賤留此鴻名

千秋榮顯



我活非
我自活
乃基利
斯督活
於我

保祿傳

保祿如德亞國搭耳蘇郡人。幼習文學。稍長。往協露撒稜。就名師加瑪禮。受業數年。凡經典書籍。無不通曉。時都內外聖教傳行。以新易古。而保祿習古教。未嘗細審異同。固執舊學。遇耶穌聖徒及從教者。無論男女老幼。謀害之。以洩其忿。曾請當道發文符。出城巡歷。拘執信人。行近達瑪斯谷府城。倏有異光圍照。保祿眩暝仆地。聞光中有聲曰。撒烏錄。撒烏錄。先名撒烏錄。後名保祿。何故害我。保祿不勝戰慄。問曰。主。爾爲誰。答曰。我是耶穌。汝所圖害者。蓋耶穌慈愛信人。不啻赤子。故信人被難。無異親受之也。

保祿大驚曰。主命我何爲。耶穌曰。且進城。將有指引爾者。保祿起。雙目已瞽。不辨道路。從者携保祿入城。三日夜未見天日。并未用膳。惟專修省之功。府中有高士名亞納尼亞。耶穌告之曰。汝往訪保祿。引其入教。亞納尼亞曰。此人殘害聖門。由來已久。今其來此。齋有公文。欲虐信士。耶穌曰。我已化之。將以爲大器。傳吾名於天下。亞納尼亞領命前往。呼曰。撒烏錄。爾途中所見耶穌。遣我來此。引爾入教。領受斯彼利多。三多神恩。言畢。保祿雙目卽明。若披雲霧。起。恭受聖水。入聖教。未幾。蒙主啟牖。貫通大道之全。化民濟衆。實繁有徒。達瑪斯谷府。有如德亞人。每七

日一會。談道論學。保祿與其會。引經典之言。明證天主降世。明敷大道。廣行靈蹟。萬不可疑。鄉人訝曰。斯人攻我教。緣何弗之禁。保祿堅持經訓。侃侃立談。四民益加妬恨。謀殺聖人。幸弟子知之。藏聖人於竹籬中。由城縫下。乘夜遁逃。還協露撒稜。巴爾納伯爲介紹。引見他聖徒。於是協力宣教。參入宗徒列。如德亞人。惡其先後異心。陰圖害之。門弟以告。亟往搭耳蘇郡。居數月。過化存神。會巴爾納伯來訪。酌議公務。二人並出境。赴安底叻基亞郡。往來數載。化人無算。既而踰山渡海。至濟伯隆島。有名巴耳葉蘇者。以魔術蠱衆。與地方官善。官聞聖人名。求晤請教。

聖人揭聖教要端。按以實理。驗以靈蹟。官敬服。巴耳葉蘇設難。置辨。曉曉不休。聖人責曰。爾眞理義之賊。邪鬼之徒。亂道背法。迄今已久。猶不欲止耶。天主嚴罰已至。盲爾雙目。不復觀光矣。言未訖。巴耳葉蘇之目已盲。不能行走。官服聖人之德。數日領訓。堅志篤信。其宗族亦然。聖人至利斯忒辣府。途遇一人。胎斃。乞食於通衢。聖人見其傾耳聽教。命起立。病者卽起。行走自如。衆人大駭。以聖人爲神道降世。欲以祭神之禮祭之。聖人曰。我亦人類耳。與爾同性。何可受爾敬哉。惟天主爲兆民大父。理當祭且謝者也。有無類輩自外鄉來。惡良民被化。謗論紛如。聖人

知不可久居。勸戒信人。辭行他去。夢見一人。邀至瑪責陶尼亞國。比醒。束裝入斐里玻府。遇一傭婦。向懷魔。發人之私。獲利給主人。迨聖人至。婦告人曰。斯非尋常人。乃天主之徒。啟人障塞。引人於正道者也。聖人憐之。命魔去。婦若再生。感謝天主。惟婦之主人。頓失所望。繫聖人而送之官。控以惑亂愚民。敗毀古教。官未審虛實。遽命笞責。下之獄。至夜。地大震。獄門自開。桎梏自脫。役卒疑犯人已出。欲自盡。聖人喝阻曰。毋自傷。吾輩咸在此。役卒然火燭之。果未出。深以爲感。向聖人叩拜。懇指正道。聖人乘機闡道。引入聖教。官聞之。飭釋聖人。隨所欲往。乃適代老亞

代郡。邑人久聞大教。濟濟受業。某夜。聖人講道。多人傾聽。一幼童熟睡。自高樓墮下。氣絕而死。衆人不勝痛。聖人抱童良久。呼耶穌聖號。令童子之魂。還至其身。遂復活。並無傷痕。又聖人造靈蹟。不必身親。出其所用巾。與所服帶。亦能愈疾病。拯患難。祛妖魔。奇驗不勝屈指。聖人自如德亞出。歷國數百。化人不下千萬。隨處遇艱。爲義受答者五。網杖者三。桀石傷者一。囚禁放流。不一而足。航海覆舟。多至三次。浮沉浪中。至一晝夜之久。陸行則遇賊。攘奪其所有。若夫饑寒露宿。忍苦受辱。尤爲其常事。似區區不足道者。如德亞古教中人。與聖人爲難。不能相容。

因連結小民。拘送於官。誣以不守戒律。乞加重戮。官審訊無罪。狀欲放釋之。惡黨妄証。官弱不能斷。欲姑順輿情。聖人不服讞。請解送羅瑪。未出獄。耶穌深夜降慰曰。保祿毋驚。勿屈於苦難。汝赴羅瑪。將有以証吾教也。聖人渡地中海。不數日。狂風驟至。舟人失措。聖人恃主慰衆。數日後飄至默里達島。舟已壞。幸人口生全。未喪一命。島民憐衆人之厄。延請登岸。燃火禦寒。聖人握薪一束。投入火中。有毒蛇出。嚙聖人手。島民疑聖人作惡。故有此報。想其毒發時必殞命也。詎聖人從容執蛇投火。無纖毫恙。島民見之。頓釋前疑。以聖人爲天神。稱道弗置。事聞島主。加

禮厚歟。會島主之父久患風疾。聖人一往顧之。沉疴若失。由是四方抱病者。接踵前來求治。聖人允焉。既而偕諸友至意大利亞國。入羅瑪京都。國王擲落特勢持強。多行不義。臣民畏之如虎。聖人初入都。往謁獄官。官未暇究事。暫羈獄內。士民間風而至。聖人晉接慇懃。朝暮設教。閱二載。始得出獄。遊意大利亞數郡。過法郎濟亞。至意西巴你亞國。隨處設教。聖德化民。閱八載餘。仍還羅瑪。適聖伯多祿亦從如德亞來。遂同志協力。廣傳聖教。未幾擲落王聞聖教大行。殊爲疑慮。命捕二聖。下之獄。二聖朝夕陳言。不廢教務。監外內之聆訓入教者。不可勝數。內有司



聖保祿如德亞
 國搭耳蘇郡人
 宣教于如德亞
 往來于亞細亞
 歐羅巴二洲之
 間、歷國數百、化
 人不下千萬、隨
 處遇艱、爲義受
 辱、卒致命于羅
 瑪、時天主降生
 後六十九年、卽
 漢明帝永平十
 二年、葬于羅瑪



獄二人兄弟也。聞正言。觀靈行。俱服聖化。爲道死刑下。官奉王命。依國律。令役卒先杖聖人。後解城外斬之。行際。有役卒三人。感而歸化。至城外四十餘里許。聖人跪地謝主。虔祈申祐。赦免讐人之罪。乃自去衣領。安心待命。掌刑者舉刃一麾。聖首落地。三躍。每一躍。地上有清泉湧出。時耶穌降生後六十九年。卽漢明帝永平十二年也。門弟子厚斂聖屍。卽葬於羅瑪。士民朝其墓者。祈福禳災。大都遂願。





聖巴爾納伯

贊

積德必祥爲善

必昌行仁輔義

澤厚流長萬鍾

何榮千金何貴

鬻產濟貧此心

乃慰非道不說

非教不扶存心

濟世戮力捐軀

天上魂歸人間

夢斷昭示來茲

聖經一卷



巴爾納伯傳附

巴爾納伯。濟伯隆島人也。乃父自如德亞。遷居彼島。娶婦生聖人。勤爲教育。幼而聰穎。好學有孝行。少長往協露撒稜。從名師加瑪禮。與保祿爲同門士。受業時。廉智悌友。未嘗優遊嬉戲。獨居修省。夙夜勤敏。屢登聖殿。叩拜天主。越數載學成。人人稱美。是時耶穌廣宣聖教。至協露撒稜。巴爾納伯隨衆出迎。得承聖訓。一日耶穌論精修之法。謂志道者宜賣田產。捨值於窮乏人。世上財。皆將損壞。惟道德之寶不朽。人何愚於擇乎。巴爾納伯既聞聖言。還鄉賣其業大半。施濟窮人。逮耶穌升天。盡售其產。

以濟貧人。憶故友保祿。向習古教。因耶穌提入聖門。先後異轍。遂求見諸宗徒。諸徒悅焉。發往安底凹基亞郡傳教。聖人承命。出遊鄰國。至厄日多。居亞立山第亞都邑。隨處施訓。躬親立表。多行靈異事。以爲聖教之證。士民被化者。不可勝數。閱數年。返安底凹基。顧其門弟。畧相勸慰。又往搭耳蘇爾郡。訪保祿。遇焉。無何。同返安底凹基。居期年。信者日衆。非他郡可比。後二聖同赴協露撒稜。與宗徒同議大事。既畢。二聖相別。各赴一方。巴爾納伯航海至濟伯隆島。傳道勸人。不遺餘力。旋適意大利亞國。晉羅瑪京都。晤聖門諸友。次往米郎郡。居七年。復返濟伯隆。見



聖巴爾納伯濟
 伯隆人傳教于
 厄日多意大利
 亞濟伯隆等處
 古教中人惡其
 行耶穌新教密
 遣匪人暗加毒
 手聖人預知終
 期致命于拳石
 下時天主降生
 後六十九年即
 漢明帝永平十
 二年



其諸弟。當時如德亞人。多有行賈于此島者。聖人苦口勸勉。信者日衆。惟古教中人。怒其行耶穌新教。密遣匪人。詣聖人之居。暗加毒手。賊方至。聖人已知。告弟子曰。小子。吾命終之期近矣。謀害我者。從遠方來矣。其邪計深藏。惟恐漏洩。然我已久識之。不敢辭避。負我主之命。所慮者。惟爾小子及諸友耳。今豫囑爾等。常懷天主洪恩。思維報謝。爾等日後。必有患難。惡人將攻聖教。魔鬼讐黨。合力連盟。殘害信人性命。然貞志實德。不能稍奪。何慮之有。倘或陡值不良。一時窘迫。須記向所聞。受苦不過暫時。而將來之賞永久也。語畢。門弟皆痛涕不已。聖人訓慰良久。

祭主禱祈福祐。告一門弟曰。今日乃我終日。我死歿後。爾詣保
祿。與之合志行道。言訖。往僻處談聖道。惡黨驟至。拘而毒毆之。
以亂石擊死。投其屍於火。既而天神下降。徒薪滅火。不令聖屍
微損。後門弟至。殮而瘞之潔地。自是善人多感。凡染病被魔。或
遇凶年賊寇。禱於聖人之墳。往往遂所願。無如屢遭兵燹。聖墓
泯踪。後數百年。聖人顯見於司教。令至某山挖掘。果得遺骸。國
王勅建寶殿。垂之永久。



聖路加

贊

闕閔之家膏梁

之子佼佼錚錚

聲名鶴起藝林

碩望學海清才

如椽大筆信手

揮來蜚英詞藻

馳譽丹青母容

一幅至寶通靈

東海可消太山

可裂惟此貞魂

不磨不滅



路加傳附

路加原籍如德亞國。其父母徙安底四基亞府。後生聖人。幼嗜學問。凡經傳子史。天文醫理。繪畫格物等學。皆樂於研求。聞耶穌之生。合先知豫語。深慰夙懷。及見聖保祿歸正。卽受業門下。從遊于羅瑪。助理教政。勸化多人。時有知識昏庸者。謬述耶穌言行。于是眞僞混淆。魚珠莫辨。天主憫焉。簡聖人爲正教史。由聖神默喻。并聖保祿指引。著聖經一卷。迄今奉爲訓典。瑪竇瑪爾谷有遺闕事。聖人補記者殊多。相傳聖人親詣聖母。恭問耶穌事蹟。俾後之傳誦是經者。無隻字差誤。約在救世主六十有

六年。聖人著宗徒大事錄一書。傳之後世。聖保祿抵羅瑪之二
年。路加志在傳教。子身別去。經利皮亞往厄日多迤東一路。在
在化人。聖額我略與聖保里諾皆云聖路加年至八十有四。致
命升天。





聖瑪爾谷

贊

一伐史才千秋

聖德可法可師

有物有則名山

述作下筆成文

引獅喻聖寓義

不羣至教所施

誘掖獎勵善者

懷恩惡者種怨

狂狷非辱雖死

亦生摩挲墓碣

永著榮名



瑪爾谷傳附

瑪爾谷如德亞人。相傳聖人曾隨耶穌遊。一日耶穌講道於衆人前曰。汝曹弗食人子肉。弗飲人子血。弗克生活。此言領聖體奧義也。聖人不能解。竟辭去。迨耶穌升天。聖人拜伯多祿爲師傅。隨往羅瑪。勸化多人。時新奉教者。聽講耶穌行實。易於誤傳。因懇筆於書。以徵信實。請命于伯多祿。亦以爲然。聖人乃著新經一卷。爲四史之一。伯多祿鑒定准行。垂流萬世。越數年。聖人由羅瑪奉差至亞基肋地方。又二年。至厄日多國。所至之地。教化廣行。棄邪信主者。不勝屈指。嗣往亞立山第亞府。見商民駢

集。戶口殷繁。卽在彼方開教。未幾。建一大堂。多顯靈跡。被化者不可勝數。其法耶穌言行。與聖人德表。而盡棄家財。居厄日多。深山修道者。亦復不少。平日克己苦身。祇用麪餅清泉。以保生命。又有三日一食。或五六日一食者。聖人竭力化人。闡揚聖道。責邪教之非。斥邪神之妄。外教人聞而怒之。陰圖殘害。聖人預知焉。恐新來奉教者。歸向無人。因以門弟亞嚴爲主教。立三司鐸。七副祭。助理教事。部署畢。起身他往。閱二年。回亞立山第亞。見教友繁盛。樂莫如之。外教人聞聖人返。怒心復熾。於耶穌復活禮日。聖人方舉行彌撒。邪黨蜂擁入堂。將聖人擒下獄。是夜。



聖瑪爾谷聖史，
 如德亞國人，由
 羅瑪奉差至亞
 基肋地方，又至
 厄日多暨至亞
 立山第亞府，闢
 揚聖道，多顯靈
 蹟，責邪教之非，
 斥邪神之妄，惡
 黨聞而怒之，陰
 圖殘害，遂至致
 命，教中人擲潔
 地葬之。約天主
 降生後六十八
 年，即漢明帝永
 平十一年，後遷
 葬物奈西亞聖
 堂。



天主遣天神降慰云。汝名已書於天冊。汝靈升天。後人將世世敬汝也。不旋踵。耶穌亦現。大呼瑪爾谷名。善言安慰。次日。邪黨提聖人出監。用繩縛頸。轉展拖擡。卒至殞命。衆人見聖人氣已絕。欲燃火燬屍。天主未容。驟發暴風雷雨。邪黨悉奔散。教中人擇潔地葬之。後遷物奈西亞聖堂。迄今敬禮之隆。有加靡已。



